

CARTA CUAYIIVI YEⁿE SAN PEDRO

**Pedro idinguúⁿ yā carta 'cūū yeⁿe
'iiⁿyāⁿ chi i'téenu yā Cristo**

1 'Úú Simón Pedro 'úú ní 'úú
ní apóstol yeⁿe Jesucristo.
Ní candéé nduudu yeⁿe Ndyuūs
ti Ndyuūs dichí'vē Jesucristo. Dinguúⁿ carta
'cūū yeⁿe 'iiⁿyāⁿ chi 'āā i'téenu n'dai
yā Jesucristo tan'dúúcā nú'suu.
'Tíicā diiⁿ Ndyuūs ndúúcu Salvador
chi Jesucristo ti cuaacu yā. ²'Úú
neⁿe chi ndís'tiī cuta'á nī nducueⁿe
vaadi n'dai ndúúcu vaadi 'diiⁿ chi
Ndyuūs téé yā ndís'tiī, ní cáávā
chi deenū n'daacá nī yeⁿe Ndyuūs
chiida yú ndúúcu Jesucristo yeⁿe
yú.

**Yeⁿe vida yeⁿe 'iiⁿyāⁿ chi
i'téenu yā Jesucristo**

³Ndyuūs cáávā poder yeⁿe yā
'āā tee yā s'uuúⁿ tanducuéⁿe caati
cuuvi 'cuēetinéé n'daāca yú ní cuuvi
dich'ēte yú Ndyuūs. Ní 'tíicā cuuvi
diiⁿ yú ti deenu yú Jesucristo chi
ch'ēte maáⁿ yā ní dííⁿ yā vaadi
n'giinu. Ní Jesucristo yaa'ví yā
s'uuúⁿ chi cuuvi yeⁿe yā s'uuúⁿ. ⁴Ní
Cristo 'āā tee yā s'uuúⁿ promesas
chí n'dēevéé n'dai ní ng'ēte ca. Ní
cucáávā promesas miiⁿ ndís'tiī ní

cuuví cuta'á nī yeⁿe vida ngai chí
yeⁿe Ndyuūs. Ní cuuvi nnguaⁿ'ai
nī yeⁿe nuuⁿndi yeⁿe iⁿ'yeeⁿdí 'cūū,
nuūⁿndi chi maaⁿ cuerpo yeⁿe yú
neⁿe chi diiⁿ yú. ⁵Maaⁿ chi i'téenu
nī Jesucristo candéé nī cuidado chi
n'daacā ca 'cuēetinéé nī. Ní taachi
n'daacā ca 'cuēetinéé nī tuu'mi ní
ca'cueéⁿ nī caati cuuvi deenu cá
nī. ⁶Ní taachi déénú cá nī tuu'mi
ní ngaⁿ'a ntiīⁿnyuⁿ nī yeⁿe maaⁿ
cuerpo yeⁿe nī. Ní taachi dííⁿ nī
chi ngaⁿ'a ntiīⁿnyuⁿ nī yeⁿe maaⁿ
cuerpo yeⁿe nī tuu'mi ní cuché
nī yeⁿe maaⁿ cuerpo yeⁿe nī. Ní
taachi cuché nī yeⁿe maaⁿ cuerpo
yeⁿe nī tuu'mi ní dííⁿ nī tan'dúúcā
chi Ndyuūs neⁿe yā chi dííⁿ nī. ⁷Ní
taachi 'āā dííⁿ nī tan'dúúcā chi
Ndyuūs neⁿe yā chi dííⁿ nī tuu'mi
ní dineⁿe nī 'áámá nī taama nī. Ní
taachi dineⁿe nī 'áámá nī taama nī
tuu'mi ní 'áámá dinéⁿe nī 'iiⁿyāⁿ.

⁸Ní yeⁿe tanducuéⁿe chuū, nduuti
chi ndís'tiī dííⁿ nī ní n'dai n'dai dííⁿ
nī tuu'mi ní cuuvi dííⁿ nī ntiīⁿnyuⁿ
yeⁿe Señor Jesucristo yeⁿe yú. Ní
dichí'vē nī Señor yeⁿe yú. Ní chuū
diiⁿ chi dichí'vē chí deenu n'daāca
cá nī Señor Jesucristo yeⁿe yú. ⁹Ní
nduuti chi 'áámá nī nguée dííⁿ nī
tanducuéⁿe chuū tuu'mi ní ndís'tiī

ní tan'dúúcā 'áámá 'iiⁿyāⁿ chi ngeenááⁿ 'tiicá nī ti nguéeⁿ cuuvi snaaⁿ nī chí yaⁿ'ai. Ní nguéeⁿ n'gaacu nī chí nduuví dēeve nī yeⁿ'e nuuⁿndi yeⁿ'e nī chí dííⁿ nī cuááⁿ vmnaaⁿ taachi caama i'téenu nī Jesucristo. ¹⁰Maaⁿ ní ndís'tiī hermanos yeⁿ'é cáávā nducuéⁿē chuū candēe cá nī cuidado chi 'aama canéeⁿ n'daaca nī ndúúcu chi i'téenu nī. Ní canee nī seguro chi Ndyuūs yaa'ví yā ndís'tiī chí cuuvi yeⁿ'é yā ndís'tiī. Ní ndēevé yā ndís'tiī. Ní nduuti chí dííⁿ nī dendu'ū chí 'túúca tuu'mi ní 'āā ntéeⁿ dē'ē cáávā chí dííⁿ nī nuuⁿndi. ¹¹Ní taachi dííⁿ nī 'túúca Jesucristo tée yā lugar ndís'tiī chí cuuvi ndaa nī naachi canee Señor Jesucristo chí nadanguaⁿ'ai yā s'uuúⁿ ní naachi cuéⁿ'é daāⁿmaⁿ ngaⁿ'a ntiiⁿnyuⁿ yā yeⁿ'ē.

¹²Ní cáávā chuū 'úú cueⁿ'e daāⁿmaⁿ idiíⁿ chí ndís'tiī n'gaacu nī yeⁿ'ē tanducuéⁿē chuū 'áará chí deenú n'dai nī yeⁿ'ē. Ní n'geetinée n'daaca nī ní n'giindivééⁿ n'daaca nī nduudu cuaacu yeⁿ'é Ndyuūs. ¹³Úú nadacádiinúúⁿ chí n'daāca ca neⁿ'e chí canduuchi cá chí 'tíicā dííⁿ chí ndís'tiī cuuvi nan'gaacu nī yeⁿ'e tanducuéⁿē chuū. ¹⁴Señor Jesucristo yeⁿ'e yú 'āā ch'iⁿ'í yā 'úú, Pedro, 'tíicā. 'Āā ntéeⁿ 'nááⁿ canduuchí ní 'cuūví. ¹⁵'Tiicá ntúūⁿ idiíⁿ chí ndís'tiī n'gaacu nī cuéⁿ'é daāⁿmaⁿ yeⁿ'e dendu'u 'cūū taachi 'āā n'díí.

**'Iiⁿyāⁿ n'diichí yā dēeve
ngii yeⁿ'e Cristo**

¹⁶Chííⁿ chí nús'uu ca'cueéⁿ 'nū ndís'tiī yeⁿ'e Señor Jesucristo yeⁿ'e yú chí ndaa ntuúⁿ yā ndúúcu poder

yeⁿ'é yā nguéeⁿ yeⁿ'e vaanicadínnūⁿ yeⁿ'e 'iiⁿyāⁿ yeⁿ'e iⁿ'yeeⁿdí 'cūū. 'Tíicā nús'uu 'āā n'diichí 'nū ndúúcu nduutinaáⁿ maáⁿ 'nū Señor Jesucristo yeⁿ'e yú chí neené ch'ēte. ¹⁷Ní n'diichí 'nū chí Cristo ní neené ch'ēte yā taachi Ndyuūs chiida yú dich'ēte yā Jesucristo ní ca'a yā Cristo chí dēevé taavi ngii yā. Caati Ndyuūs chí dēeve ngii ca ngaⁿ'á yā yeⁿ'e Cristo ní n'giindivééⁿ 'nū nduudú 'cūū. Chuū caⁿ'a Ndyuūs: Sáⁿ'a 'cūū chí daiyá chí neⁿ'e taaví ní 'úú néené yeenú yeⁿ'ē daiyá. ¹⁸Ní nús'sū maáⁿ 'nū ch'iindivééⁿ 'nū nduudu 'cūū chí chiica yeⁿ'e va'ai chēeti nguuvi taachi cueⁿ'é 'nū ndúúcu Jesucristo na yīicū chí duuchi N'dēevé N'dai.

¹⁹Maaⁿ ní cu'téenu cá 'nū chí nduudu cuaacu chí 'iiⁿyāⁿ profetas candēe yā tiempo chí 'āā chó'oo ní cuaacu. N'daaca ca chí ndís'tiī i'neeⁿveéⁿ nī nduudú 'cūū. Nduudú 'cūū tan'dúúcā 'áámá chideeve chí ngii yaⁿ'ā na 'áámá cuaaⁿ chí maāⁿ. 'Tíicā yeⁿ'ē, ní chideeve ní ngii ndii tiempo chí ndaa nguuví ní can'daa 'ííⁿnyúⁿ chí nguuví 'yuudi chí nduudu cuaacu ní canee na staava yeⁿ'é nī. ²⁰Neⁿ'é chí ndís'tiī vmnááⁿ vmnaaⁿ nadacadínnūⁿ nī yeⁿ'e chuū. Mar 'áámá nduudu yeⁿ'e libro yeⁿ'é Ndyuūs chí ngaⁿ'ā yeⁿ'e 'áámá dendu'ū chí cuchii ndís'tiī nguéeⁿ dámaāⁿ maáⁿ nī cuuvi deenú nī yeⁿ'ē. ²¹Ní nduudu cuaacu chí ngaⁿ'a profetas tiempo chí chó'oo nguéeⁿ ngaⁿ'a yā yeⁿ'e chí nadacadínnūⁿ yā maáⁿ yā naati Espíritu N'dai yeⁿ'é Ndyuūs yaa'ví yā profetas nduudu cuaacu chí caⁿ'a yā. Ní nduudu yeⁿ'é yā ngiica yeⁿ'é

Ndyuūs ti 'áamá dífⁿ yā ntiiⁿnyuⁿ
yeⁿé Ndyuūs.

Yeⁿé 'iiⁿyāⁿ chi nguée ca'cueéⁿ yā
nduudu cuaacu yeⁿé Ndyuūs

2 Tiempo chi chó'oo nguaaⁿ
'iiⁿyāⁿ Israel véé 'iiⁿyāⁿ
profetas chi nguée ngaⁿa yā nduudu
cuaacu yeⁿé Ndyuūs. 'Tiicá ntúūⁿ
tiempo maaⁿ caⁿa n'dai maestros
yeⁿe yaācū nguaaⁿ ndís'tiī chi
nguée caaⁿmán yā nduudu cuaacu
yeⁿé Ndyuūs. Ní candée n'de'ei
yā nduudu chi nguée cuaacu chi
diiⁿ chi nguée i'téenu ní Cristo.
Ní 'iiⁿyāⁿ s'eeⁿ caaⁿmán yā contra
yeⁿe Jesucristo chi nadanguáⁿai
yā 'iiⁿyāⁿ. Ní chífⁿ chi dífⁿ yā diiⁿ
chi 'iiⁿyāⁿ s'eeⁿ niiⁿnuuⁿ niiⁿnuúⁿ
nūūⁿ 'cuiinú maán yā. ²Áará chi
nguée 'tíicā chiiⁿ chi ngaⁿa 'iiⁿyāⁿ
s'eeⁿ 'yaaⁿ 'iiⁿyāⁿ ní 'caandiveéⁿ yā
yeⁿe 'iiⁿyāⁿ s'eeⁿ. Ní dífⁿ yā chi
nguée n'daacā tan'dúúcā chi diiⁿ
'iiⁿyāⁿ s'eeⁿ. Ní nguée n'daacā ngaⁿa
'iiⁿyāⁿ s'eeⁿ yeⁿe yúúní cuaacu chi
evangelio chi nduudu ngai yeⁿe
Jesucristo. ³Ní 'iiⁿyāⁿ s'eeⁿ ca'cueéⁿ
yā nduudu chi ngiica yeⁿe chi
maán yā nadacadíinuūⁿ yā ti neⁿé
yā tuumī chi ndís'tiī ca'á ní 'iiⁿyāⁿ
s'eeⁿ. Áā 'naaⁿ tiempo chi Ndyuūs
'āā n'diichí yā nuuⁿndi yeⁿé yā ní
'āā ngaⁿá yā chi 'iiⁿyāⁿ s'eeⁿ 'āā
condenado yā.

⁴Deenu yú chi Ndyuūs nguée
nadich'écú yā yeⁿe ángeles chi
dinuuⁿndí yā naati s'neéⁿ yā cuaaⁿ
chuva'ai na infierno ní s'neéⁿ yā
naachi maafⁿ. Ní dichiichí yā
ángeles ndúúcū cadenas. Ní ángeles
cúnee yā miiⁿ ndii nguuví chi Cristo
caⁿá yā n'diichi yā nuuⁿndi. ⁵Ní

deenu yú chi Ndyuūs 'āā idi'cuiinú
yā iⁿyeéⁿdí' cūū ndúúcū 'iiⁿyāⁿ
yeⁿe taachi dífⁿ yā chi chee cúúvī
vmnááⁿ iⁿyeéⁿdí ndúúcū 'iiⁿyāⁿ chi
nguée n'daacā idiíⁿ yā. Ndyuūs
dámaaⁿ nadinguaⁿai yā saⁿa Noé
chi candée sa nduudu cuaacu yeⁿé
Ndyuūs ndúúcū táámá ndēēchē
'iiⁿyāⁿ. Tanaⁿa cá yā ní ch'iī
yā. ⁶Tiicá ntúūⁿ Ndyuūs dífⁿ yā
condenar 'iiⁿyāⁿ yeⁿe yáāⁿ Sodoma
ndúúcū yaāⁿ Gomorra. Ní di'cuiinú
yā yáāⁿ s'eeⁿ chi nduuví yāiyāā
cáávā chi dicho'ó yā nguuchi yáⁿā
vmnaaⁿ yáāⁿ s'eeⁿ. Ní 'ícú Ndyuūs
s'neeⁿ yā ejemplo 'cūū chi 'iiⁿyāⁿ chi
cuchiī cuayiivi, ní nguée n'daacā
idiíⁿ yā, cuuvi deenú yā táácā cuuvi
chó'oo yeⁿe yā. ⁷Naati Ndyuūs
nadanguaⁿai yā yeⁿe yáāⁿ s'eeⁿ
saⁿa Lot chi saⁿā n'dai, saⁿā chi
ch'leenu sa chii caavā chi diiⁿ 'iiⁿyāⁿ
chi nguée n'daacā. ⁸Ní Lot miiⁿ chi
n'dai sa canée sá nguaaⁿ 'iiⁿyāⁿ
s'eeⁿ. Ní nguuví nguuví n'diichi sa
ní n'giindiveeⁿ sa nducuéⁿē chi dífⁿ
yā chi nguée n'daacā. Ní n'geenu sa
ngii na staava yeⁿe sa. ⁹Ní nduuti
chi Ndyuūs dífⁿ yā 'túúcā tiempo
chi 'āā chó'oo 'tiicá ntúūⁿ Ndyuūs
deenú yā táácā chi nadanguáⁿai yā
'iiⁿyāⁿ chi i'téenu yā Ndyuūs yeⁿe
'iiⁿyāⁿ chi nguée n'daacā idiíⁿ yā
chí n'diichineeⁿ yā 'iiⁿyāⁿ yeⁿe yā.
'Tiicá ntúūⁿ Ndyuūs deenú yā táácā
ca'á yā testigo 'iiⁿyāⁿ chi nguée
n'daacā ndí taachi ndaa nguuví chi
n'diichí yā nuuⁿndi yeⁿe nducyaaca
'iiⁿyāⁿ.

¹⁰'Tiicá Ndyuūs ca'a yā castigo
'iiⁿyāⁿ chi dífⁿ yā nuuⁿndi tan'dúúcā
chi neⁿe cuerpo yeⁿé yā. Ní nguée
n'giindiveéⁿ yā nduudu cuaacu

yeⁿe 'iivú Ndyuūs. 'Iiⁿ'yāⁿ s'eeⁿ ní nguéeⁿ 'va'á yā chi caaⁿ'maⁿ yā cosas chi nguēē ndaacā yeⁿe 'iiⁿ'ntyéⁿē. Ní nguéeⁿ 'va'á yā yeⁿe mar 'áámá. Ní dííⁿ yā nducuéⁿē nuuⁿ'ndi chi neⁿe yā. ¹¹Ní ángeles nguéeⁿ 'tíicā yā. 'Áará chi ditiinu cá yā nguéeⁿ ti 'iiⁿ'ntyéⁿē s'eeⁿ ti taachi ndaá yā nanááⁿ Señor Jesucristo yeⁿe yú nguéeⁿ cunncāā ngaⁿ'a ángeles contra yeⁿe 'iiⁿ'ntyéⁿē s'eeⁿ. ¹²'Iiⁿ'yāⁿ s'eeⁿ dííⁿ yā tan'dúúcā 'yúudu taáⁿ dííⁿ ti ní nguéeⁿ nadacadíínuuⁿ ti. 'Tíicā dííⁿ yā. Ní tan'dúúcā 'iiti taaⁿ chi 'iiⁿ'yāⁿ n'nuúⁿ yā ní n'giiⁿ'núⁿ yā 'iiti, 'tíicā 'iiⁿ'yāⁿ s'eeⁿ. Ní cunncāā ngaⁿ'a yā yeⁿe dendu'ū chi nguéeⁿ ituumicadíínuuⁿ yā. Ní 'cuūví yā tan'dúúcā 'áámá 'iiti taaⁿ. ¹³Ní 'iiⁿ'yāⁿ s'eeⁿ ní ch'eenú yā chi caati 'āā dííⁿ yā chi tanáⁿ'a yā ch'eenú yā chi. Maaⁿ ní yeenú yā chi dinuuⁿ'ndí yā tan'dúúcā chi neⁿe cuerpo yeⁿe yā. Ní nduuti chi 'iiⁿ'yāⁿ s'eeⁿ caⁿ'á yā ndúúcu nī ní che'é yā ndúúcu nī taachi véé 'viicu yeⁿe nī tuuⁿ'mi ní nadacadíínuuⁿ yā chi nginnche'éeí yā ndís'tii. Ní chuū ni cosa chi cuuvi 'cuinaáⁿ yā yeⁿe.

¹⁴'Iiⁿ'yāⁿ s'eeⁿ taachi n'diichí yā 'áámá n'daataá neⁿ'é yā caⁿ'á yā ndúúcu n'daataá miiⁿ. Dámaāⁿ neⁿ'é yā dinuuⁿ'ndi yā ní nginnche'éeí yā 'iiⁿ'yāⁿ chi debil staava yeⁿ'é yā chi dinuuⁿ'ndí yā. 'Iiⁿ'yāⁿ s'eeⁿ deenu n'dai yā na staava yeⁿ'é yā chi neⁿ'é yā dendu'ū chi nguéeⁿ n'daacā. Ní Ndyuūs ngaⁿ'a yā yeⁿe yā 'tíicā: D'e ch'úú cá ya'ai yeⁿ'é yā ti condenado yā. ¹⁵'Iiⁿ'yāⁿ s'eeⁿ diví yā yeⁿe yúúni cuaacu yeⁿe Ndyuūs ní chiicá yā yúúni chí neⁿe maáⁿ yā. Dííⁿ yā tan'dúúcā chi dííⁿ profeta Balaam

chi daiya saⁿ'ā Beor. Tiempo chi chó'oo Balaam miiⁿ neⁿe sa dííⁿ sa ganar tuumí yeⁿe chi nguéeⁿ n'daacā chi dííⁿ sa. ¹⁶Ní taachi cueⁿ'e sa ndúúcu burro yeⁿe sa, burro yeⁿe sa ngaⁿ'á ti ndúúcu nduudu yeⁿe 'iiⁿ'yāⁿ ní dííⁿ ti reprender saⁿ'ā Balaam miiⁿ yeⁿ'ē nuuⁿ'ndi chi dííⁿ sa. Ní 'āā ntéeⁿ dííⁿ sa nuuⁿ'ndi miiⁿ tiempo miiⁿ.

¹⁷Ní 'iiⁿ'yāⁿ s'eeⁿ ní tan'dúúcā vaacu nuūⁿ'nī díyaāi 'tiicá yā. Tan'dúúcā meēēⁿ chi candéē 'yúúné taaⁿ 'tiicá yā. 'Iiⁿ'yāⁿ s'eeⁿ ní condenado yā ní caⁿ'á yā cho'ó yā naachi diituu n'dái maaⁿ. Ní miiⁿ canee yā cueⁿ'e daāⁿ'maⁿ. ¹⁸'Iiⁿ'yāⁿ s'eeⁿ ní ngaⁿ'a yā nduudu n'geete chi nguéeⁿ dichíí'vē. Ní ndúúcu vicio yeⁿe yā, ndúúcu nducuéⁿē nuuⁿ'ndi chi neⁿe cuerpo yeⁿe yā, 'iiⁿ'yāⁿ s'eeⁿ ní neⁿ'e yā dííⁿ yā chi tanáⁿ'ā 'iiⁿ'yāⁿ chi 'āā nduuvideēvé yā ní 'āā ntéeⁿ caⁿ'á yā ndúúcu 'iiⁿ'yāⁿ chi dinuuⁿ'ndi yā ní tanáⁿ'a yā neⁿ'é yā nanguēēcúndii ntuúⁿ yā ní dinuuⁿ'ndi yā taama vmnéⁿ'ēē. ¹⁹'Iiⁿ'yāⁿ s'eeⁿ chi nginnche'éeí yā 'iiⁿ'yāⁿ ngaⁿ'á yā chi caⁿ'á yā 'iiⁿ'yāⁿ s'eeⁿ chi libre yā. 'Iiⁿ'yāⁿ s'eeⁿ maáⁿ yā ní canée yā prisioneros yeⁿe nuuⁿ'ndi chi dííⁿ yā. Ní ca'áámá ca'aama 'iiⁿ'yāⁿ chi nguéeⁿ libre yā ní canée yā maaⁿ poder nuuⁿ'ndi ní nguéeⁿ cuuvi cucheē yā yeⁿ'ē. ²⁰Ní 'iiⁿ'yāⁿ chi i'téenu yā Señor Jesucristo yeⁿe yú ní yeⁿ'é yā, ní Cristo 'āā nadanguáⁿ'ai yā 'iiⁿ'yāⁿ yeⁿ'e nducuéⁿē chi nguéeⁿ n'daacā yeⁿ'e iⁿ'yeeⁿ'dí 'cūū. Ní cuayiivi miiⁿ nduuti chi 'iiⁿ'yāⁿ nanguēēcunée yā taama vmnéⁿ'ēē ní dííⁿ yā dendú'ū nuuⁿ'ndi chi yeⁿ'e iⁿ'yeeⁿ'dí

'cūū tuu'mi ní cunncaā ca canee yā nguée ti tiempo chi 'āā cuée i'téenu yā Jesucristo. ²¹N'dáacā ca chi 'ii'yāⁿ s'eeⁿ nguée n'diichí yā yúúni cuaacu yeⁿé Ndyuūs ti taachi 'āā n'diichí yā yúúni cuaacu tuu'mi ní ndaācādaamí yā yeⁿe ley yeⁿé Ndyuūs chi Ndyuūs ca'a yā 'ii'yāⁿ s'eeⁿ. ²²Ní cho'oó yeⁿe 'ii'yāⁿ s'eeⁿ tan'dúucā chi ngaⁿa 'áámá nduudu cuaacu 'tíicā: 'Yaānā nguēcunée ti che'e ti chí ndaāchi tī ní cuuchí chi 'ii'yāⁿ naaⁿnú yā chi dēēve tī ní nguēcunée ti ngeⁿe tī nguēcundāa tī nguaaⁿ nuūⁿnīⁿ ncheētí.

Jesucristo ndaá yā taama vmnéⁿēe

3 Ndís'tií hermanos yeⁿé chi neⁿe taaví, carta 'cūū ní ndii chíí ndii 'úúví chi idinguúⁿ yeⁿe ní. Ní na 'uuví carta chi idinguúⁿ yeⁿe ndís'tií, neⁿé dííⁿ chi nadacadíínuuⁿ nī yeⁿe nducuéⁿē chi dēēve n'dai. Ní teé consejo ndís'tií chi n'gaacú nī yeⁿe nducuéⁿē chi idinguúⁿ. ²Neⁿé chi n'gaacu nī yeⁿe tiempo chi chó'oo yeⁿe profetas chi dēēve ní ngaⁿa yā nduudu cuaacu. Ní n'gaacú nī yeⁿe tiempo maaⁿ yeⁿe mandamiento yeⁿe Señor chi nadanguáⁿai yā s'uúúⁿ. Mandamiento yeⁿé yā ní apóstoles chi'cuee yā ndís'tií.

³Ní vmnááⁿ vmnaaⁿ nadacadíínuuⁿ nī yeⁿe chuū chí nguuvi s'eeⁿ chi 'cuiinū iⁿ'yeeⁿdí 'cūū. Véé 'ii'yāⁿ chi duuchinéeⁿ yā yeⁿe nducuéⁿē chi yeⁿé Ndyuūs. Ní 'ii'yāⁿ s'eeⁿ dííⁿ yā nuuⁿndi tan'duucā chi maáⁿ yā neⁿe yā. ⁴Ní ngaⁿá yā: ¿Tíí cánée promesa chi ngaⁿa chi Cristo canée chi ndaa yā táámá vmnéⁿēe? Ndii

tiempo chi 'āā chó'oo taachi ch'ii 'ii'yāⁿ yeⁿe ndaata yeⁿe yú. 'Āā daamá nuuⁿ canée tanducuéⁿē ndíí taachi Ndyuūs din'dái yā iⁿ'yeeⁿdí. ⁵Ii'yāⁿ chi ngaⁿá yā 'tíicā nguée neⁿe yā dííⁿ yā cuenta yeⁿe tiempo chi 'naaⁿ tiempo chi chó'oo. Tiempo miiⁿ Ndyuūs ngaⁿá yā ní ndúúcū nduudu yeⁿé yā din'dái yā nánguuví ndúúcū iⁿ'yeeⁿdí 'cūū. Ní iⁿ'yeeⁿdí 'cūū canee na lugar yeⁿé cáávā nduudu yeⁿé Ndyuūs. ⁶Ní iⁿ'yeeⁿdí yeⁿe tiempo chi chó'oo ní chiituú nuūⁿnīⁿ ní ndai naāaⁿ yeⁿé cáávā chi cheeⁿ taaⁿ cúúví. ⁷Ní nanguuvi ndúúcū yáⁿāa chi véé maaⁿ Ndyuūs ca'a yā orden yeⁿé chi canée chí candee yā cuidado yeⁿé ndii tiempo chi cuucu ndúúcū yaⁿā. Ní taachi ngiichi yáⁿāa miiⁿ tuu'mi ní Ndyuūs n'diichí yā nuuⁿndi yeⁿé 'ii'yāⁿ. Ní Ndyuūs dííⁿ yā chi 'cuiinū 'ii'yāⁿ chi nguée n'daacā.

⁸Maaⁿ ní ndís'tií hermanos yeⁿé chi neⁿé taavi, nguée cuuvi naáⁿ nī chi nanááⁿ Ndyuūs 'áámá nguuvi ní tan'dúucā chi 'áámá mil nduūyū ní 'áámá mil nduūyū ní tan'dúucā chi 'áámá nguuvi. 'Tíicā canée nanááⁿ Ndyuūs. ⁹Ní Señor Jesucristo yeⁿé yú nguée cuuvi 'naa yā yeⁿe chi ngaⁿa yā chi diiⁿ yā tan'dúucā chi nadacadíínuuⁿ tanáⁿā saⁿā. Naati Ndyuūs ní véé paciencia yeⁿe yā ndúúcū s'uúúⁿ caati nguée neⁿé yā chi 'aama yú cuuvi ndai yú ti neⁿé yā chi nducyaaca s'uúúⁿ ní ndaacadaami yú yeⁿé nuuⁿndi yeⁿe yú.

¹⁰Ní nguuvi chi ndaa Señor Jesucristo taama vmnéⁿēe, nguuvi miiⁿ ndaa tan'dúucā chi 'ááma

duucu chi indáá n'gaaⁿ. Ní nguée canée ngiinu yú yeⁿē nguuvi 'cūū taachi Ndyuūs nadi'tuūví yā nanguuvi yuudu n'dái 'cuēcú. Ní tanducuéⁿē chi vée nanguuvi ní cuūcū ní 'cuiinū ndúúcū ngiichi yaⁿā chi 'iiⁿnuⁿ taaⁿ. Ní yáⁿā ntúūⁿ va ndúúcū tanducuéⁿē dendu'ū ní cuūcū.

¹¹Deenu yú chi tanducuéⁿē dendu'ū chí 'túúcā 'cuiinu tuví. Ní ʔtáácā cuuvi 'cuēetinée nī? Ndís'tiī canee chi ca'á nī núúⁿmaⁿ staava yeⁿē nī na ta'a Ndyuūs ní dich'etē nī Ndyuūs. Ní 'cuēetineē nī dámaāⁿ tan'dúúcā chi Ndyuūs neⁿē yā.

¹²Tíicā 'cuēetineē nī 'naaⁿ chi canee ngiinu yú ndii nguuvi chi ndaā Señor Jesucristo taama vmnéⁿēe. Ní diiⁿ yú nducuéⁿē ntiⁿnyuⁿ yeⁿē Señor caati niiⁿnuúⁿ niiⁿnuuⁿ cuuvi ndaa yā. Nguuvi chi ndaa yā nánguuví ní cuūcū ní 'cuiinu ndúúcū tanducuéⁿē chi vée yeⁿē. Ní 'cuiinu ntuvíí cáávā nguuchi yaⁿā.

¹³Naati s'uuúⁿ ní canée ngiinu yú chi snaaⁿ yú 'áámá nanguuvi chí ngai ndúúcū 'áámá iⁿyeēⁿdī chí ngai naachi vée dámaāⁿ nducuéⁿē chi cuaacu ní nducuéⁿē ní n'daacā n'dai. 'Tíicā Ndyuūs ngaⁿá yā chi tée yā s'uuúⁿ.

¹⁴Ní cáávā chuū ndís'tiī hermanos chi neⁿē taavi, 'naaⁿ tiempo chi cunee ngiinú nī dendu'ú 'cūū candē cá nī cuidado chi 'diiíⁿ 'diiiⁿ 'cuēetineē nī ní nguée dinuuⁿndí nī. Ní 'tíicā nguée vée culpa yeⁿē nī nanááⁿ Ndyuūs taachi Cristo

ndaa yā. ¹⁵Diíⁿ nī cuenta chi Señor Jesucristo yeⁿē yú ndúúcū ngiinū n'dái diíⁿ yā ndúúcū yú caati neⁿē yā chi nanguaⁿai yú. 'Tiicā ntúūⁿ Pablo, hermano yeⁿē yú chi neenē neⁿē yú, 'āā dingúúⁿ yā yeⁿē ndís'tiī 'áámá carta ndúúcū vaadi deenu chi Ndyuūs nca'á yā Pablo miiⁿ. ¹⁶Ní Pablo miiⁿ ngaⁿá yā yeⁿē nducuéⁿē 'cūū ndúúcū vaadi deenu yeⁿē Ndyuūs na nducyáácā carta chí dingúúⁿ yā. Ní naⁿa carta yeⁿē yā duū'vi dendú'ū ní n'gíⁿi n'dái chi cuuvi déenu yú. Ní 'iiⁿyāⁿ chi nguée deenu yā ndúúcū 'iiⁿyāⁿ chi duu'vi i'téenu yā nguée ngaⁿá yā nduudu cuaacu yeⁿē dendu'ū chi ngii ní yeⁿē 'tēē chi canée nguūⁿ. Ní caavā chi ngaⁿá yā chi nguée cuaacu ní diíⁿ yā chi canée chi ntuvíí maāⁿ yā.

¹⁷Naati ndís'tiī hermanos yeⁿē chi neⁿē taavi, 'āā deenú nī dendu'ú 'cūū. Cundée nī cuidado chi nguée 'caandiveēⁿ nī nduudu yeⁿē 'iiⁿyāⁿ chi nguée diíⁿ yā chi ngaⁿa ley yeⁿē Ndyuūs iiⁿyāⁿ chi candē yā ndís'tiī lado yeⁿē yā ti ndís'tiī nguée 'cuēetinée n'daacā ndúúcū chi i'téenu nī.

¹⁸Maaⁿ ní ndís'tiī cu'téenu cá nī Señor Jesucristo yeⁿē yú chi nadanguáⁿai yā s'uuúⁿ. Ní itée yā s'uuúⁿ nducuéⁿē chi n'dai taavi yeⁿē yā ndúúcū vaadi deenu yeⁿē yā. Ngaⁿa yú chi Jesucristo miiⁿ ní ch'ēete cá yā maaⁿ ndúúcū nguuvi chi cúchií ní cueⁿē daāⁿmaⁿ. 'Tíicā cuuvi.